

# Modal insan teras capai wawasan

Oleh Mohd Feroz Abu Bakar

**P**UTRAJAYA: Datuk Seri Abdullah Ahmad Badawi berkata, cita-cita negara tidak akan tercapai hanya dengan meningkatkan infrastruktur atau menambah bilangan sumber tenaga murah, sebaliknya memerlukan peningkatan tahap produktiviti dan daya saing negara.

Perdana Menteri berkata, persaingan negara lain menuntut Malaysia melakukan anjakan besar dari segi pembangunan modal insan bagi melangkah ke peringkat pembangunan dan mencapai Wawasan 2020.

Justeru, katanya, Misi Nasional dan Rancangan Malaysia Kesembilan (RMK-9) menetapkan pembangunan modal insan berminda kelas pertama sebagai satu daripada lima teras ut-

ma ke arah mencapai Wawasan 2020.

"Kejayaan agenda pembangunan modal insan amat bergantung kepada kualiti sistem pendidikan negara dan satu agenda penting kerajaan adalah membangunkan sistem pendidikan bertaraf dunia.

"Sistem itu tidak hanya tertumpu kepada pembangunan modal insan berpengetahuan dan berkemahiran yang mampu bersaing di pasaran ker-

ja global semata-mata, malah membangunkan modal insan bersifat menyeluruh, progresif, bermoral dan beretika tinggi.

"Memandangkan Malaysia negara majmuk, sistem pendidikan juga perlu mampu membangunkan masyarakat bersatu padu dan bertoleransi," katanya dalam perutusan pada buku Pelan Induk Pembangunan Pendidikan 2006-2010 Kementerian Pelajaran yang akan dilancarkannya di sini hari ini.

Abdullah berkata, Kementerian Pelajaran mempunyai tanggungjawab besar memastikan generasi muda negara menjadi modal insan berwibawa, berpengetahuan, berkemahiran dan berketerampilan.

Namun, katanya, tanggungjawab membentuk generasi muda adalah tanggungjawab semua pihak dan segenap lapisan masyarakat, sepatutnya memberi komitmen penuh bagi memastikan agenda pendidikan negara terlaksana.

## INFO

### 6 teras Pelan Induk Pembangunan Pendidikan

- Membina negara bangsa
- Membangunkan modal insan
- Memperkasa sekolah kebangsaan
- Merapatkan jurang pendidikan
- Memartabatkan kerjaya keguruan
- Melonjak kecemerlangan institusi pendidikan